

Angajoqqaat sulinnigiffeqartarnerat pillugu malittarisassat atuuttut allanngortinnissaannik siunnersuusioqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, matumani sulinnigiffeqartarnerup sapaatip akunnerinik sisamanik sivitsorneqarnissaa siunertaralugu. Allannguut atuutilissaaq ulloq 1. juli 2019.

(Inatsisartunut ilaasortaq, Randi Vestergaard Evaldsen, Demokraatit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerpeqarnera

Naalakkersuisut Ilaqutariinnermut Peqqissutsimullu Ataatsimiititaliaq siunnersuummik suliaqarluarneranut qutsavigaat.

Ilaqutariit pitsaasunik sinaakkuteqarnissaat, aamma siusinaarluni pitsaaliuinnermik suliniutit ukkatarineqassasut Naalakkersuisut isumaqatigaat. Angajoqqaat sulinnigiffeqartarnerannik sivitsuineq, suliniutaavoq tamatumingga qulakkeerinnittussaasoq. Pingaaruteqarpoq, angajoqqaat meeqqallu inuunerminnik pitsaanerpaamik aallartitsissasut pitsaasunik toqqissisimanartunillu sinaakkuteqarlutik.

Ullumikkulli suliffeqarfeqarnermi eqimattaqarpoq angajoqqaat sulinnigiffeqarnerata sivitsorneqarneranik atuinissamut akissaqanngisaannartussanik. Matumani Naalakkersuisut immikkut eqqarsaatigaat isertitakitsut, sila, tunisassiassanik amigaateqarneq il.il. pissutigalugit piffissat ilaanni sulinnigiffeqarsinnaasartut. Eqimattaq taanna ullumikkut ikittuinnarnik erninnermut atatillugu ikiorsiissutisisarput. Taakku eqimattat aningaasaqarnikkut atugaat aaqqiivigineqanngippata, aningaasaqarneq pissutigalugu maanna angajoqqaat sulinnigiffeqartarnerisa atuutereersup annertunerpaartaa pinngitsoorusuttuassavaat. Eqimattat taakku pitsaanerumik atugaqalernissaat erninnermut atatillugu aningaasaateqarfiliornikkut pisinnaavoq.

Taamaattumik Naalakkersuisut erninnermut atatillugu aningaasaateqarfimmik pilersitsisinnanermut periarfissat pillugit suliffeqarnermi akuusunik oqaloqateqarneq ingerlatiinnarniarpaat, taamaasillutik aningaasaqarnikkut pitsaavallaanngitsumik inisissimasut, matumani pingaartumik isertitakitsut, erninnermut atatillugu aamma angajoqqaatut sulinnigiffeqartarneq pillugu inatsit pissutigalugu pitsanngoriaatinik aamma misigisaqassammata.

Oqaatigineqartariaqarpoq, ullumikkut taakku akissarsianit tamakkiisunit matussusiivigineqartut sapaatit akunnerini sisamani sivitsuutaasuni tamakkiisumik akissarsianik matussusiivigineqassanngimmata, tamatumani isumaqatigiissutitigut aalajangersarneqarsimmata, taamaattumillu isumaqatiginninniutaqqaartariaqarlutik. Tamanna isumaqarsinnaavoq, ikittuinnaat sapaatit akunnerinik sisamanik kingullernik atuisassasut.

Angajoqqaat sulinnigiffeqartarnerisa sivitsornissaanik piviusunngortitsinissaaq, aningaasanut inatsisip isumaqatigiissutigineqarneratigut aningaasatigut sinaakkutissat qulakkeerneqarput.

Taama oqaaseqarlunga Naalakkersuisut inassutigaat allannguutissatut siunnersuut akuersissutigineqassasoq.